

朔州志

朔州志卷之三

方輿志

沿革

疆域

山川

巡幸

古蹟

風俗

方輿有紀肇自禹貢詳於周官從來尚矣故列古今
變置之久近山川道里之險夷民物風土之醇澆名
邱勝蹟之興廢使觀者燦若指掌統於方輿備之所
係綦重哉朔州晉之北鄙當中外之交輿地最廣雖
歷代遞興沿革不常而疆域猶是山川依然其間四
方所至關隘道路疆界攸分形勝風景歷歷可指而
地居衡岳之西雁塞之北國有大事或祀與戎乘輿

時一駐蹕焉若夫豪傑挺生英雄用武世遠人湮遺
踪猶在至於移風易俗雖由人為所致要亦地氣使
然皆為方輿所必詳爰別為序次如左而各冠以圖
以便觀覽云志方輿

沿革

唐 堯都平陽分天下為九州地屬冀命和叔宅朔方

曰幽都地在冀北因名朔幽 見尚書及通考

虞 舜都蒲坂肇十有二州置牧命禹治水始冀以冀

廣析為并幽營三州地介并幽 見尚書及通考

夏 禹都安邑復并天下為九州地仍屬冀 見禹貢及通考

商 湯都亳因夏九州封同姓於代地在代西屬冀 文見

獻通考

周 武王都鎬分天下為九畿亦曰九州列職方正北

曰并州 春秋晉之北鄙狄人所居 戰國趙襄子

滅代武靈王破林胡樓煩攘地千里置雲中雁門代

郡地介其中 見文獻通考

秦 始皇都咸陽罷侯置守分天下為四十郡於雁門

郡始置馬邑

縣按廿一史記始皇三十二年使將軍蒙恬發兵三十萬人北擊匈奴略取

河南地築城養馬因以名縣馬邑之名始此即今古城址又晉太康地記云秦初築城將成輒崩忽有馬周旋馳走反覆父老異之因依其地以築城乃不崩遂名馬邑附志以備參考

西漢 高祖都長安更定郡國制天下為十三州并治

晉陽分雲中置定襄 武帝置朔方郡雁門郡馬邑

縣仍舊地介雁門定襄之間并州之域見前漢書

東漢 光武帝都洛陽并省郡國復置刺史亦為十三

州并治晉陽雁門郡馬邑縣仍舊 順帝徙朔方來

治五原

獻帝置新興郡

按靈帝末北部大擾上郡朔方五原定襄雲中五郡

獻帝建安二十年省入冀州魏王曹操始集塞下荒地立新興郡地介其中 見後漢書

三國魏

文帝據有中原都鄴地仍新興郡黃初元年

復徙置并州自陁嶺以北竝棄於外 見三國志

晉 世祖都洛陽分天下為十九州并治晉陽雁門郡

馬邑縣仍舊改新興為新昌轄九原定襄雲中廣牧

晉昌五縣地介其中

按晉書懷愍時中原雲擾劉石符姚占據不常懷帝永嘉四年

并州刺史劉琨以鮮卑拓拔猗盧助討劉虎白部與猗盧結為兄弟表為大單于以代郡封之為代公尋進爵代王猗盧以封邑去國懸遠民不相接乃帥部落萬餘家自雲中入雁門從琨求陞北之地琨不能制且欲倚之為援乃徙樓煩馬邑陰館繁峙崞五縣民於陞南以其地與之居馬邑即今古城也自後猗盧弟弗之子鬱律鬱律之子什翼犍皆以勇略雄於北方然內難相繼外患遞起晉孝武太元元年符秦乘釁滅之分代為二部自河以東屬之代部大人劉庫仁加封廣武將軍十一年西燕主慕容永又以鐵弗劉衛辰為大將軍朔州牧劉虎白部庫仁衛辰皆匈奴遺種衛辰少子後為赫連勃勃數十年間拓拔氏旋興旋衰至太元十二年拓拔珪中興始克復祖業

北魏

道武帝初都定襄盛樂宮後徙都平城東至代

郡西及善無南極陰館北盡參合皆為畿內地介其

中後魏分東西地屬東魏

按魏太武延和二年於定襄故城置懷朔鎮領郡五

縣十四太和郡轄狄那捍殊新昌三縣廣寧郡轄石門中川二縣神武郡轄尖山殊顏二縣太平郡轄太

平太清永寧三縣附化郡轄附化息澤五原廣牧四縣後自孝文遷洛重文輕武邊務弛役同廝養孝

明正光中高平懷荒沃野柔元鎮民相繼叛攻陷懷朔武州等鎮孝昌中改懷朔鎮為朔州朔州之名始

此地在今州北三百八十里葛榮之亂州廢為北道大行臺爾朱榮所據稱重鎮焉見北齊書

北齊

文宣帝篡東魏都鄴天保六年復置朔州

在今州西

四十七里新城今故址猶存地名沙河

八年徙馬邑

即古城

領廣安郡招

遠縣

在今州西八十里

武成帝太寧中復置北道大行臺地

屬北齊 見北齊書

北周 孝閔帝滅齊都長安 武帝保定中置朔州總

管府地屬北周 見北周書

隋 高祖都長安開皇初置總管府 煬帝都洛陽大

業初府廢置代郡尋改馬邑郡 按隋馬邑郡領縣四鄯陽神武雲內開陽

郡名鄯陽始此今州南有神武村州東有鄯河

唐 高祖都長安武德初改郡為州置朔州或為馬邑

郡領縣二鄯陽馬邑 按唐初仍置總管府後改置朔州或為馬邑郡領鄯陽馬邑二

縣鄯陽縣有武州塞本漢定襄縣北魏桑乾郡北齊黃安郡也有紫河發源於此馬邑縣漢屬雁門郡元

宗開元中析鄆陽東三十里於大同軍置馬邑縣南至朔州四十里即今馬邑也州郡本治鄆陽德宗建中中節度使馬燧徙治馬邑後復故治

五代唐 莊宗起太原滅梁都汴以晉陽為北都襲唐

之舊朔仍振武軍

明宗都洛於馬邑置襄州

見五代史

五代晉 高祖都汴朔仍振武軍因借契丹兵滅後唐

立為皇帝割幽涿薊檀順瀛莫蔚儒新應朔雲武

襄十六州以賂契丹歷漢周至宋並棄於外

見五代史

宋 太祖都汴朔在北漢太原以北地悉屬契丹太

宗雍熙七年克雲應朔襄四州置吏未幾復陷徙吏

民入關 徽宗宣和五年金人約宋滅遼以武朔二
州來歸置朔寧軍七年金人渝盟復陷地仍屬金終
宋之世關外諸州旋得旋失內以三關為界

見宋史

遼 太祖初起遼東神冊元年破後唐振武軍徙其民
於東 太宗時晉割地後遂以幽州為燕京雲州為
西京於朔州置順義軍領縣三鄆陽縣漢定襄新興
北魏桑乾地馬邑縣漢屬雁門唐析置馬邑地寧遠
縣北齊招遠地

見遼史

金 太祖初起女真滅遼後割廣武隸代州於朔州仍

為順義軍領縣二鄴陽馬邑後陞馬邑為固州見金史

元 太祖起蒙古幹灘河 太宗建上都於開平 世

祖都燕以雲中為大同路朔州隸焉領鄴陽馬邑二

縣置錄事等司 見元史

明 太祖建都金陵分王畿以外為省 成祖遷都北

平定天下為兩京十三省改大同路為大同府隸山

西布政司轄十一州縣朔州屬焉復即其地分置朔

州衛 見明史 按朔州舊志載洪武三年指揮鄭遇

春奉勅開設朔州衛考明史洪武二年命副將常遇春定大同叅政傅友德將兵屯朔州三年都督汪興祖克武朔等州二十八年馮勝奉命率列侯籍

太原平陽民為兵伍置衛屯田立東勝大同等衛朔州衛開設年月未詳舊志又載世宗嘉靖四十三年領馬邑縣并有一衛二項必有所據考明史及廣輿記雲中志俱未載亦無冊籍碑記可徵附志以備叅考

國朝

世祖章皇帝順治元年定鼎北京州仍前制屬大同府十六年裁衛歸州

今上雍正三年於大同右玉林衛分設朔平府割朔州屬焉

朔之命名其來已遠堯典和叔宅朔方則在冀州太

原北漢書武帝置朔方郡在今寧夏地順帝徙朔方
來治五原在今歸化城至朔之為州則始自北魏初
於定襄故城置懷朔鎮後改為州其地在今州北三
百八十里則長城邊外矣北齊初置朔州在今州南
四十七里沙河遺址猶存繼遷馬邑即今古城址北
周置朔州總管府隋初置朔州後改馬邑郡領鄯陽
神武等縣唐改馬邑郡仍為朔州於鄯陽東別置馬
邑在今州東四十里後唐置振武軍宋置朔寧軍遼
置順義軍金復置朔州領鄯陽馬邑二縣元明均為

朔州隸於大同

國初因之

今上新設朔平府朔州屬焉而其名不改遠稽近考在在可指第隋以前馬與朔合而為一唐以後朔與馬分而為二又其所當辨者分別觀之則其地之人與事可以類而推云

疆域

關塞 道路附

雍正三年三月十五日

上諭

周禮稱惟王建國體國經野孟子亦言仁政必自經界始疆界所關誠為至重從來兩省交壤之地其界至多有不清雲貴川廣等處為尤甚間至一省之內各州縣地界亦有不清者每遇命盜等事則互相推諉曠廠鹽茶等有利之事則互相爭競甚非息事寧民之意朕深知此弊今特降諭旨與各省督撫其共矢公心勿存私見詳細清查如與鄰省地界有不清者則兩省各委實在賢員公同勘定若本省內地界有不清者即委其本省賢員勘定地皆朕土人皆朕臣此盈彼絀悉在朕版圖之內無容分視也雖界域間有難定之處但平心勸畫即使稍有不協然一定之後久遠得以遵據永無推諉爭競之處於地方大有裨益矣其舉行此事宜於農

陳之時所派官員不得私受請屬收取餽遺及科派百姓騷擾經過地方如有發覺定重治罪諸督撫各慎為之特諭
欽此

州境

東至州境烟墩村東三十里交馬邑縣十里鋪界

西至州境蕎麥川西六十五里交神池縣利民堡界

南至州境沙河鋪五十五里交寧武縣陽方口界

北至州境西水澗九十里交平魯縣三十里鋪界

東南至州境南榆林村六十里交馬邑縣廣武城界

東北至州境泥河村七十里交山陰縣河陽堡界